

編號 1 號

【野蓮鳥】李宜諭原作

熱天个美濃湖，湖面就像大大个鏡仔，日頭下發光个水波瞞啊瞞欸，鏡仔裡背有層層疊疊个岫崗、青柳柳个樹仔、闊闊个天、白白个雲……。這個時節，一陣野蓮鳥低低个飛過湖面。

熱天係野蓮鳥个繁殖期，佢兜會變到特別靚哦！該鳥毛當打眼，全身有一跡一跡金黃色、咖啡色、白色同烏色个色目。厥腳長攞長攞¹，腳趾長長細細支，佢兜當好行在浮在水面个葉仔頂，故所，在濫泥地大概都會看著佢兜个身影。野蓮鳥个本名安到「水雉」，因為佢兜行路个樣仔優雅，長長个尾攞啊攞欸實在靚，故所，大家也會喊佢兜「凌波仙子」。

在水陸交接个濫泥地有當多野生个動物同植物。尤其有兜罕得看著个野生雞仔、鴨仔、雁仔，佢兜愛生養下一代抑係徙賓，都定著愛在濫泥地，故所，又有人同濫泥地喊做「鳥類樂園」；佢還係地球个腰仔唷，有一等強个生態淨化功能。毋過，這下濫泥地都漸漸仔毋見忒也，還過田坵个用藥忒傷重，故所，當多生態都分人破壞了了，盡多鳥仔、蟲仔、蛎仔都死淨淨，甚至絕

種，水雉也係面臨共樣个命運。

恁多年來，保育團體同美濃湖个野蓮農共下營造友善生態環境，錫來水雉在這做賓生養下一代，漸漸仔野蓮田就有咧多樣个自然生態，水雉也換名安到「野蓮鳥」，變做美濃湖个觀光特色之一。

其實，原旦野蓮農當惱水鳥仔，見擺正種啊著个野蓮苗還冇釘根²，水鳥仔就來啄，分佢啄死咧就愛補種，加盡無閒，野蓮農就會想辦法同佢兜逐走。再來就係野蓮仔種下去 50 日，葉仔較撈實壯旺也，水雉就會在葉頂做賓，毋過，20 日過後野蓮仔就愛收成也，恁堵好又也係水雉生卵孵子个時節，愛仰結煞正好？野蓮仔係無去採收，就會忒老賣毋出去，毋過，係去採收野蓮仔，水雉孵子就會失敗。

好得有農民願意退一步，野蓮鳥孵卵个所在，野蓮仔就莫採收，留分佢兜去孵卵出子。因為大家共同个合作，營造咧一個友善環境分野蓮鳥做得永久在這生活，這下美濃湖裡背个生態緊來緊豐富哩！

¹ 長攞長攞：音 congˋ sung congˋ sung；喻修長。

² 釘根：音 dang ginˊ；生根扎穩。

編號 2 號

【攀樹】徐姿華原作

六月初，學校安排佢兜體驗「攀樹」，請來當有經驗个教練團教佢兜攀樹。在活動該日，大家做下當期待，先生帶等興嘍嘍个佢兜來到集合地點，教練先講解規則同注意事項，逐儕目金金仔、耳角角仔聽到入文，同平常時上課昏哆昏哆个樣仔相爭已多。

續下來，教練教佢兜著護具、戴手落仔同安全帽，帶佢兜去到學校該頭百過年个大榕樹下。其他个教練既經先準備好勢，同當多定滑輪還過索仔固定在樹頂，這就係佢兜愛攀樹个工具。攀樹同蹶樹仔無共樣，攀樹係運用攀樹索、吊帶、鈎環、踏索這兜，手腳搵出力，撐起圓身一步一步攀往上；教練講解、示範過後，愛換佢兜上場哩。

正起勢，逐儕做下驚驚毋敢行前，大膽个阿智好擲擲仔¹搶先愛攀，體育股長阿宏也行前去，教練口頭指導，佢兜當順序定定仔緊攀緊高，攀到離地 4 公尺恁高个時節，還笑咪咪仔翕相留念；佢兜過繼續緊攀往上，直直到教練設个目標 8 公尺高該位，

¹ 好擲擲仔：音 hau jied jied eˋ；興緻很高的樣子。

拿著「攀樹證書」正坐在樹梗奈一下；佢兩儕在樹頂當歡喜，緊喊佢兜遽遽攀，講樹頂當好搞。

佢攀樹个時節當緊張，手腳搵毋著，索仔拉到歪歪斜斜，一下仔撞著樹仔、一下仔拂去碰著同學；阿芬也無較慶，索仔拉到迂迂轉，硬硬會打結。一時間，樹頂、樹下有人笑到哈哈滾、有人驚到腳底撓撓緊嗽眊，十分鬧熱。已無簡單，佢攀到 5 公尺高咧，手軟腳犁想愛停下來，在樹頂个教練就同佢搵手分佢坐在樹梗頂歇睏；佢扳等樹仔緊啟大氣，涼風吹來同頭先个煩躁、緊張吹毋見忒；對樹頂看出去遠遠个所在，闊茫茫个捻黃禾田同青山襯等藍天白雲，正經分人心情舒爽。

好恬恬一列紅色間等白色个普悠瑪號火車對田脣颯啊過，「哇！火車！」樹頂个同學做下大聲喊，還在樹下个同學就脰有脰仔²看往上，等毋得著好遽遽攀上樹頂共下奈。

這擺攀樹，有人驚高、有人毋敢躡³上樹桎，驚該旨踏著樹桎、無把扼个感覺；毋過，經過教練、同學搵手同鼓勵，逐儕都學會信付、承擔、合作同勇敢；也分佢兜知得面對困難莫跂跂縮縮⁴、總愛膽在在去克服，身邊定著會有人肯同佢搵手啦！

² 脰有脰仔：音 goi' iog' iog' eˋ；因為想吃，而流口水的樣子。

³ 躡：音 kiam；跨越。

⁴ 跂跂縮縮：音 giu' giu' suˋ suˋ；形容不敢大步向前行而無膽的樣子。

編號 4 號

【屋下个燕仔】曾俊鑾原作

又到了燕仔轉來臺灣个季節，逐位都聽得著嘅嘅啾啾个叫聲。

十五年前，老屋飛來一對燕仔，該年生三竇，頭竇無出子，第二竇嘅有一隻白色个燕仔。

聽講，頭擺个人想愛證明燕仔明年會轉竇無，會在燕仔个腳項綑一細截紅線。吾屋下毋使恁麻煩，因爭連續八年，至少有一隻白雪雪个鳥子孵出來，最多係一竇三隻。這係「白化症」，生來就有个遺傳病，本成就盡罕得看著，毋知係鳥公抑係鳥嫲摺這種基因傳分後代？

鳥子一出世，鳥公、鳥嫲日時頭總係無閒泊杈，飛往出飛往入，啲等細蟲仔餵鳥子，烏白不管，逐隻都有分。當像餵毋飽樣，鳥公、鳥嫲一飛兼，鳥子个嘴就擘到大嫲隻。到暗夜，一隻在鳥竇掌等，另外一隻就在無幾遠个門鈴頂背歇睏。來幾輪過後，屋下人就喊佢兜係「屋下个燕仔」。

鳥公、鳥嫲逐年二月中轉來，時間差毋多會到哩，屋下人會頭臥臥仔緊望；到十月佢兜就跔等北風下南，闊闊个天墀坪一眨

目又變到冷冷落落。佢兜毋識共下轉屋，會所爭兩三日，逐擺重逢，幾暢仔你就毋知哩！嘅嘅啾啾鬧熱煎煎，樹尾、花園、天頂都係佢兜活跳拍翼个形影，續下來就看佢兜聯合逐屋簷鳥，因爭佢兜下南个時節，竇會分屋簷鳥號走。偌摺屋下人長透坐在交椅項，看佢兜整竇、絡食、唸嘴、孵卵、餵鳥子，摺一竇過一竇會飛無幾久个鳥子送走，反反覆覆，一年過一年。

毋過，天下無不散个筵席，臺灣、南洋飛去飛轉八到，最尾一年單淨就一隻飛轉來。看佢日時頭挨挨轉緊飛，暗晡就企在門鈴該位，等幾下日等伴毋著，叫聲緊來緊淒涼，長聲思念短聲情。一日朝晨，燕仔在竇前挨幾圈過後，當像告別長鳴一聲，飛出去就無再過轉來哩。

過後就無燕仔到屋下歇。三年過後，阿公正摺鳥竇劇忒，毋過，到今跡還係看現現，就像屋下个燕仔，還留在偲俚个心肝肚。